

12. november 2013

UKA 2013/24  
Anders Olsen

**Kalaallit Nunaannut kræfti pillugu pilersaarut.**

(Peqqissutsimut Attaveqarnermullu Naalakkersuisoq)

Kalaallit Nunaannut kræfti pillugu pilersaarut Siumumiit imaattumik oqaaseqarfigissavarput.

Siumup tunngaviumik qulakkeersimajuarniarpa Kalaallit Nunatsinni innuttaasut peqqinnissakkut sullinneqarnermi pitsaasumik pisortanit isumagineqartumik periarfissaqartuarnissaat. Tassalu innuttaasut peqqinnikkut inooqatigiinnikkullu pitsaarnarpaamik atugaqar-nissaat siunertaralugu suliniuteqartuarnissaq Siumumiit pingaartilluinnarparput.

Siorna 2012-imi upernaakkut "Kræfti pillugu nassuiaat 2011" saqqummiunneqarpoq Inatsisartunilu oqaluuserineqarluni. Nassuiaat imartuujusoq suliarillugaasorlu assigiinngitsorpasuar-nik tikkuusiffiusup maanna kinguneraa oqallisigisatta massumap, tassalu "Kalaallit Nunaannut kræfti pillugu pilersaarut"-ip timitalerneqarluni Inatsisartunut saqqummiunneqarmat.

Nunatsinni kræftimik nappaateqalersartut ajoraluartumik akuttunngitsumik tusartar-pagut, taamaattut nappaatip annertuumik innuttaaqatitta akornanni atugaanera ilisimaarillu-arpurput. Taamatullu eqqugaasimasut pineqartillugit nikallornartarpoq pineqartumullu ilaqutaasunullu misiginneqatiginninnartarluni peqqisseqqinnissaanillu kissaasinartarluni.

Taamaattumik nunatsinni nappaassuup taassuma atugaanerata annertunerusumik ilisi-masaqarfiginissaa siunertaralugu suliniutit assigiinngitsut qulaajaanertallit annertuut inger-lanneqarput, tassami nappaassuup atugaanerata annertusiartuinnartutut isikkoqartup inga-lassimatinnissaannut paasissutissanik iliuusissanillu sukumiisumik anguniagaqartoqartari-aqarnera avaqqunneqarsinnaajunnaarluinnarmat.

Nunatsinni kræftimut tunngatillugu killiffiup sumiinneranik ersersitsinissaq pisariaqarluin-nartutut naliliiffigineqarpoq, taamaasilluni ersersinnaajumallugu aqutit suut kiisalu pina-veersaartitsinissamut katsorsaanissamullu periarfissat suut atorlugit ingerlariaqqittoqarnis-saa qularnaarumallugu, taamaaliornikkummi nappaassuup pinaveersaartinneqarnissaa siusissukkullu naappaammik sumiissusersisarnissat anguneqarsinnaaniassammata.

Siumumiit maluginiakkatta annerit ilagaat nunatsinni kræfteqalersarnermut peqqutaasut annersarigaat ulluinnarni inooriaatitsinniit aallaavilimmik peqqinnangitsumik inoori-aaseqarneq. Tamanna soorunami eqqarsariarnarpoq annertuumillu inooriaatsitta naliler-

soqqinnissaanik ilaatigullu allannguiffiunissaanik kaammattuisoqarsinnaanissaa aqcutissat ilaattut taaneqarsinnaalluni.

Taamaattorli pinngortitaanitsinni sananeqaatigut aallaavigalugit kræftimik allamilluunniit nappaammik eqqugaasarsinnaanerput eqqumaffigisariaqarparput, tassami ilaatigut peq-qissumik inuuneqaraluartulluunniit kræftimik eqqorneqarsinnaasarput, ilaatigut kræfti ilaqtariinni kingornuttagaasinnaasarmat. Taamaattumik peqqinnissaqarfiup iluani sulisut aalaakkaasut pikkorissartinneqartuurtullu pisariaqartippagut, sulisut akornanni ilinniartitaaneq qaffassissoq siunniuffigaluguttaaq, taamaasiornikkummi kræftip siusissukkut paasineqarlunilu sumiissusersineqarsinnaanera inuup inuuneranut aalajangiisuulluinnarsinnaasog pinaveersaartinniarneqarsinnaammat.

Misissuisimanerup takussutissippaatigut nappaammik kræftimik eqqorneqartartut ukiut 30-it matuma siornatigornit amerlassusaat marloriaatinngorsimasut. Taassumaannaalluunniit pisussaaffilerpaatigut immikkut ittumik iliuuseqarasuarnissatsinnik. Taamaattumik "Kræfti pillugu nassuiaat 2011" siorna suliarereerlugu maannalu "Kalaallit Nunaannut kræfti pillugu pilersaarut"-ip Inatsisartuni eqqartorneqarnera neriummik annertuumik pilersitsivoq, tassami nappaassuup akiorniarnissaanut suliniutit paasissutissanik tigussaasunik imaqtartut ingerlariaqqinnissami tunngavissiisussaammata.

Inuuneq erlinnaqimmat aammalu peqqilluni inoorusunnaqimmat inuunermik peqqinnarne-rusumik amerlanerpaat inooriaaseqalernissaat matumuuna kaammattuutigerusunnarpoq, taamatullu susasaqtartut pinaveersaartitsinermik suliaqarnerisa suli ullumikkornit sakkortusisamik Naalakkersuinikkut tapersersorneqarnissaat anguneqartariaqartoq isumaqarluta.

Naggataatigut Siumumiit taamatut oqaaseqarluta "Kalaallit Nunaannut kræfti pillugu pilersaarut"-ip nuna tamakkerlugu kræftimik akiuniarnermi sakkussatsialattut neriuuteqarfialugu tamakkiisumik taperseratsigu matumuuna oqaatigissavarput.